

KANTON SARAJEVO**SKUPŠTINA KANTONA SARAJEVO****NAROD I PRAVDA****Danijela Kristić, zastupnica****PEDIJATRIJSKA KLINIKA KCUS****PREDMET: INICIJATIVA**

Ovim putem podnosim inicijativu za uvođenje prakse korištenja heklanih hobotnica na odjelu neonatologije KCUS - BOLNICA JEZERO u inkubatorima, posebno za prijevremeno rođene bebe.

Obrazloženje:

Projekat pomoći nedonoščadima pomoću hobotnica-čudesnica postoji od januara 2013. godine i veoma je popularan u Holandiji, Švedskoj, Belgiji, a od 2018.godine i u drugim zemljama i na svim kontinentima. Anketa sprovedena na konferenciji neonatologa u Ukrajini 2015, dala je sljedeći rezultat: 48 od 50 neonatologa izjavilo je da je uočilo boljitak od korišćenja pletene hobotnice u oporavku nedonoščadi. Ovakva ocjena motiviše dalji razvoj projekta.

Inkubatori mogu zaista biti zastrašujuća i usamljena mjesta za prijevremeno rođene bebe, a upravo zbog toga su liječnici u Danskoj još 2013. godine došli do originalne ideje proučavajući bebe s hobotnicama. Otkrili su da su prijevremeno rođene bebe koje su u svojim prvim danima uz sebe imale heklane hobotnice poboljšale svoje disanje, imale pravilne otkucaje srca i više nego zadovoljavajuću razinu kisika u krvi, a osim što se pokazalo da male hobotnice pozitivno utječu na ukupno zdravstveno stanje - imale su i odličan smirujući utjecaj na bebe. Pokazalo se da se beba kada ručicom uhvati krak hobotnice smiri, disanje joj se stabilizira jer osjeća sigurnost kao dok je bila u maminom trbuhu i mnogi ih nazivaju hobotnice čudesnice. Rade se po strogim pravilima u interesu zdravlja bebica i ta pravila su jedinstvena u cijelom svijetu. Starijoj djeci s odstupanjima u neurološkom razvoju ljekari takođe savjetuju upotrebu heklanih hobotnica – kao vježbe za razvoj sitne motorike ruku. Istraživanja pokazuju da se mnoga takva djeca, igrajući se hobotnicama-čudesnicama, umiruju i opuštaju. Također pokazale su se dobre u sprečavanju bebica da čupaju sonde, braunile i ostale aparate priključene na njih, tako što bebe posežu za krakovima i time se zaokupiraju.

Na inicijativu majke Zinete iz Tuzle, nakon smrti jedne bebe (blizanci), praksa korištenja hobotnica zaživjela je i u BiH. Prvo su tu praksu prihvatili klinički centri u Tuzli i Mostaru, pa zatim klinike u Doboju, Foči, Bihaću. Cilj je da sve klinike uvedu ovu praksu, tako da smo mišljenja da bi KCUS trebao uvesti tu praksu.

Također je važno istaći da se u Općoj bolnici „Prim.dr.Abdulah Nakaš“ Sarajevo od 2021.godine koriste heklane hobotnice kod prijevremeno rođene djece i i novorođenčadi.

Sarajevo 27.04.2026.godine

Zastupnica u Skupštini KS

Danijela Kristić